

光緒山西通志

儒行錄

錄七

山西通志第二百五十三

賜進士出身頭品頂戴兵部侍郎兼都察院右副都御史巡撫山西提督軍務臣張煦奉
旨監修

西河退老於焉傳經龍門設教爰始講學世儒矻矻於漢宋
之外湖厥所來宜未有先於晉者也夫經師家法去聖未遠
序詩編雅授受秩然談理者輒斷爲後人僞託將古無可信
之書矣王氏中說以道自任洙情沂思漸啟關洛考古者或
譏爲大言欺人是世無希聖之學矣河汾盛業輝映後先蓋
未易爲論定也然自宋學大明而後海內儒術歸於一途晉
俗純朴尤尠歧趨學者恪遵所聞動云著書明道高者爲語
錄次之爲講章其說已多且備特通經致用無取空談則非
知之難能行爲難非言之難力行而不負所言爲難耳先正

事迹既錄入鄉賢矣輒採方聞增益舊志先儒行於文苑但主名實不分宗派而溯風氣所開卽斷自文中世家始云

歷代

王隆字伯高龍門人傳高祖元則業教授門人千餘隋開皇初以國子博士待詔雲龍門帝常從容問之隆對深切上默然曰先生朕之陸賈也何以教朕隆承詔著興衰要論七篇每奏上稱善文中子銅川府君之述曰興衰要論七篇其言六代之得失明矣隆出爲昌樂令遷猗氏銅川所治著稱秩滿退歸遂不仕卒薛道衡嘗與楊素論王通曰鄉人也是其家傳七世矣皆有經濟之道而位不逢故河汾王氏儒林推之

王伯華龍門人文中子之族父也遷於易

王度隆子文中子兄也嘗讀說苑文中子見之曰美哉兄之志也於以進物不亦可乎起家爲御史將行謂文中子曰何以贈我文中子曰清而無介直而無執曰何以加乎文中子曰太和爲之表至心爲之內守之以恭行之以道退而謂董常曰大廈將顛非一木所支也嘗爲芮城令重陰陽王氏家書稱芮城府君古鏡記文中子兄王度大業九年冬以御史帶芮城令持節河北道開倉糧賑給陝東時天下大饑百姓

痛疫存活甚衆裴翬聞喜人文中子舅也受詩於文中子嘗問穆公之事文中子曰舅氏不聞鳳皇乎覽德輝而下何必懷彼也以上解州

右隋四人

薛知仁汾陰人文中子謂知仁善處俗以兄芮城之子妻之薛方士汾陰人受詩於文中子裴嘉有婚會方士預焉酒中

樂作方士非之而出文中子聞之曰薛方士知禮矣然猶在

君子之後乎

蒲州府

王凝字叔恬文中子弟也從受元經文中子曰賢哉凝也權則未而可與立矣又嘗謂魏徵曰汝與凝皆天之直人也徵也遂凝也挺若並行於時有用舍焉謂李靖曰凝也若容於時則王法不撓矣文中子卒事寡嫂以恭順著居家不食肉曰無求飽一布被二十年不易曰無爲費天下也貞觀中起家監察御史時杜淹爲御史大夫凝疏劾侯君集太宗以君集有功而長孫無忌善君集乃與淹不協而貶凝爲胡蘇令又爲太原令凝臨官計曰受俸鄉人有誣其稅者一歲再輸平居栗如子弟非公服不見閭門肅若朝廷年踰七十手不輟經慨然曰日月逝矣不可使文中子之教不達於茲也召

三子而教之略例焉

程元絳人文中子在絳元因薛收而來與之言六經元退謂收曰夫子載造彝倫一匡皇極微夫子吾其失道左見矣於是備聞六經之義元嘗偕收見文中子問曰二生之學文奚志也對曰尼父之經夫子之續不敢怠也文中子曰允矣君子展也大成居而安動而變可以佐王也文中子嘗謂聞過而有喜色程元能之謂李靖智勝仁程元仁勝智而又嘗許程元王孝逸之文王疑曰夫子得程仇董薛而六經益明對問之作四生之力也

以上絳州

右唐四人

邢鑑字叔明文水人少而篤學有經世濟物之心從晉谿任先生遊講習十年行修經明時方以詞賦取士鑑潛心經術

因見詘於是謀道山林不復以仕進爲意嘗與參政歐陽修

范仲淹學士石介爲知交卒年六十有七

太原府

張會元翼城人仁宗朝累舉進士不第退而講授一時人才蔚起募工修文廟先聖賢像文潞公記稱之

甯知曲沃人嘉祐中鄉貢進士哲宗間樞密副使王巖叟從

誰學對曰河東甯先生由是知名

以上平陽府

李大節高平人春秋毛詩尤精天文地理之學志尙高潔恥爲一切工僞之事里人稱爲長者子旦孫異曾孫森元孫

晏世躋顯仕

澤州府

侯可字無可孟人道濟子少以氣節自喜既仕篤志爲學博極羣書聲聞四馳尤熟於西北形勢開渭源地八百頃猝與敵遇分其騎爲三高幟徐行敵不敢動以討儂智高功拜武

爵不就改文資歷大理寺評事遷殿中丞皆有異績生平以勤學新民爲已任晚究心於天人性命之學喜規人過寓居華陰自陝以西學者莫不宗之

侯仲良字師聖可子仲良與二程爲中表弟兄遠心性理初從伊川學未悟乃杖策訪濂溪濂溪留之對榻夜談越三日自謂有得如見天之廣大往質伊川伊川訝其不凡曰非從濂溪來邪後遊荆門胡文定公重之留與爲鄰嘗遺書楊大諫曰侯仲良者去春自荆門遣卒甲馬之中脫身相就於漳水之濱今已兩年其安於羈苦守節不移固所未有至於論講經術則通貫不窮商略時事則纖微皆察方值艱難使此輩身老貧賤亦良可慨尋卒所著有論語說及雅言行世上

州平定

右宋六人

鄭時昌字仲康洪洞人孝友性成八歲通易讀書過目成誦
寒暑不輟大定問對策第一世宗欲以典樞要辭不受就汾
州教授抵西河訪子夏遺蹟衍河汾之傳理學大明編韻類
忠節事並羣書會要行於世

平陽府

董殘應州人明昌四年六月賜有司所舉德行才能之士同
進士出身殘與焉

劉摯雲中人明昌五年三月詔各路舉德行才能之士特賜
同進士出身

以上大同府

田世英河中人舉興定進士官虞鄉令知金將亡退而不仕
及元平天下設諸路儒學提舉大選士士爭嚮學時亂離之
後無從得師以世英儒宿多來從學郡士大半出其門世英

博學能文尤長於詩議論慷慨喜賓客好誘掖後進性貞介
雖退居家貧惟以詩書自樂中統間卒年七十二蘄州總管
趙資翁志其墓府

蒲州

宋景初高平人官平原教授以經術迪士厯宰晉城鄉甯平
潭三縣後家居七年朝論高之擢國史編修至諭德卒於官
郝玉璵字晉卿陵川人多疾厭科舉學嘗語從學元好問曰
今人試學以速售爲功六經百家分磔緝綴或篇章句讀不
之別而得之不免爲庸人又曰讀書不爲藝文選官不爲
利養惟通人能之又曰今之仕多以貪敗皆苦饑寒不能自
持耳丈夫不耐饑寒一事不可爲子以吾言求之科舉在其
中矣或曰以此學進士無乃戾乎曰正欲渠不爲舉子耳貞
祐中居河南往來淇衛間爲人有崖岸耿耿自信落魄困窮

終不一至豪富之門年五十卒於舞陽

晁國章字公憲高平人會孫也教授鄉里樂於提誨諸生經指授者肅然如在官府進退拱揖皆有可觀蓋其家法云上

澤州府

右金七人

同恕字寬甫太原人僑奉元父繼先博學能文廉希憲辟掌庫鑰家世業儒同居二百口無間言恕安靜端凝羈止如成人日記數千言年十三以書經魁鄉校至元間貢禮曹辭不行仁宗初拜國子司業三召不起陝西行臺侍御史趙世延請中奉元置晉齋書院中書奏恕領教事制可之來學者千數至祐時再主鄉試人服其公六年以奉議大夫太子左贊善召入見中宮賜酒慰問因獻書歷陳古誼英宗初以疾歸

致和元年拜集賢侍讀學士以老疾辭恕之學由程朱上溯孔孟教人曲爲開導性整潔平居雖大暑不去冠帶事繼母如所生父喪哀毀致目疾家無擔石儲而聚書數萬卷扁所居曰築菴時蕭鄭居南山下入城府必主恕家士論稱之鄉里稱先生而不姓至順二年卒年七十八贈翰林直學士謚文貞著築菴集二十卷

第五居仁字士安太原人幼師蕭欒弱冠從同恕受學博通經史躬率子弟致力農畝而學徒常滿其安度雅量能容人所不能容鄉里高其行義率多化服作字必楷整游其門者不惟學明而行加修焉卒之日門人私謚曰靜安先生

以上太府

張著字仲明襄陵人元初中詩賦選旣而嘆曰士當以遠大

期雕蟲篆刻何爲者遂沈潛伊洛之學中統改元頤齋張公
宣撫河東擢潞城主簿爲政廉明未幾以親老西歸薦授平
陽教授以成就後進爲已任晉人以文名者多出其門壬辰
卒所著有蒙溪集詩學淵源子思敬能紹父業歷任無爲茶
陵二州後提舉河南江北儒學號寓堂有文集行世

屈繼平字正卿翼城人生七歲而孤性敏強記鄉儒柴奉先
大奇之妻以女爲給養食俸就學焉習舉業於鄉先生崔良
佐至元應試中選遂得儒官籍生平手不釋卷好獎誘後進
爲鄉里所推重旣得程朱義理之學卽濯去科舉餘習每以
所得誘進學者喻以爲人之道故翼之儒者知有程朱之學
自繼平始門人號曰北城先生大德元年卒

張遵信字誠之襄陵人幼習舉業大德間鄉貢進士與兄友

愛甚至晚從臨川吳澂學於聖賢之學得體認之實至大間
任本縣學諭擢晉府經歷常扁堂曰時思澂爲之記以上平陽府
王士綱長子人從學陝西侯伯政博綜道奧恬退不仕築粹
經樓集書數千卷日訓子弟於其中元末兵亂經籍散失樓
至明初猶存潞安府

王天祺字秋岩西河人孝友能文徵教職舉茂異皆辭疾不
赴門人李峽等爲之立碑

李邦用介休人鄉貢進士少有大志不泥俗學孝弟出於天
性其行已教人一以孝弟爲先時望歸之

柳誠汾州人任國子監助教德行純篤問學淵閑太學仰爲
真儒以上汾州府

元凱高平人有文學爲時稱譽隱居不仕以德義表率鄉閭

著述窮極天人發前賢所未發士多傳誦之

衛元凱字舜舉陽城人性清介有學行積書盈室肆力博覽

登元統間進士砥行以終

以上澤州府

王忠武鄉人少穎悟力學事母以孝聞平生崇正闢邪鄉黨推爲端士云

伯德履信字順之平定人少聰慧篤志好學博通經史大德元年以鄉薦領忻州學事正己率人人皆化之邪辟者避不敢見五年解任歸里於葭池村建立義學教誨生徒多所造就

司良輔代州人至元中鄉舉除儒學正不就家居教授以朱程之書布北方尊信者尙寡良輔諄諄開示切要於是從遊日衆人稱爲鄉先生云

郭伯順保德人性醅朴博學通五經尤精於易蔚爲儒宗恬于利祿州府屢辟不就

岐裕齋解州人隱居不仕以學行重於鄉於所居建孔顏曾燕居堂及學舍歲時率鄉人修祀事習禮儀敘鄉飲少長之節教樹畜敦行誼子孫耕讀以爲世守甘貧賤無外慕鄉里化之

段思義字季方稷山人成已子受學於父國史院承旨閻文公與芹溪並薦於朝授平陽路儒學教授不就往來韓城愛其風土因徙居焉以經史授徒不倦

以上各州屬

右元十六人

王承亨太原人受學薛瑄門後任隆慶知州著有宦績子瑱遷於理學爲世名臣蓋淵源有自云

徐行岢嵐人性強記爲文千言立就志行敦篤善教人治戴
禮者胥出其門隱居草野讀書自娛年八十餘手不釋卷子
瑤除永平教授珮無錫丞忠厚咸有父風

郭儒字一泉祁縣人嘉靖丁酉舉於鄉授涇化知縣蒞任六
年致仕歸行李一肩視來時無異邑人士醵餽千金卻弗受
在官修城堡及廟學輕徭役均賦稅課諸生文藝躬厯會所
冬夏給薪水必備家居耕耘自給年踰八十力學不衰篤信
朱子及許魯齋薛敬軒三子之學嘗輯爲續近思錄而序之
謂學者由茲錄以求三子並孔孟則聖賢可厯階馴致矣當
世以爲知言

以上太
原府

胡純平陽人翰林應奉洪武中以耆儒碩學徵至京師授以
官不就謫廣西桂林府閉戶卻掃潛心性理之學都督韓觀

嘗造其宅終不報謝再至謂曰先生於觀似無情者純曰將軍知我固如此所謂士伸於知己者觀歎息而去

杜駿翼城人幼習舉業聞薛敬軒講學河津負笈從之授太極圖說遂大悟隱居不仕宏治間提學王鴻儒延問體用一源微顯無間之旨稱爲隱君子

張克溫臨汾人宏治乙丑進士官戶部員外以廉稱博覽經籍制行以古人自期師事之者甚衆稱張夫子云

馬紹武字振初潛心儒學事親至孝居喪盡禮北遊平水作精詣堂會體驗程朱書暨讀書錄年二十有八卒著孝友論崇正辨復性解諸說載自修錄中

張沐字浴心平陽衛人初名芝問師王濬初曰晉張芝何如人師曰善學書沐曰學不務本於身心何益乃更名沐父早

卒事母孝喜讀先儒語錄壁間大書一誠字手訂治心編卒年二十五

陳師亮襄陵人八歲父卒母裴氏以節著師亮天性孝友潛心正學佩服程朱語錄從辛復元遊著日新錄適性稿等書安貧樂道母病篤割股和藥以進病隨愈有司扁旌焉督學張象南拔入邑庠卒年三十四妻李氏矢志事姑撫其二子人稱一門雙節云

李丕挺字元芳曲沃人天啟丁卯舉於鄉志氣軒豁性情質直常自箴曰養胸中正氣學天下好人處戚友間善則與不善則斥絕無回護眾亦不怨三十而卒士林惜之

郭允升字大猷曲沃人崇禎癸酉年已六十餘乃以書經冠本房一時稱爲得人甲戌署維縣教諭日聚諸生講求性命

文章之業教敦實行濰人稱山右夫子尋以疾卒濰士扶柩

泣送者數百人

以上平陽府

衛子剛蒲州人性敏篤學耿介自持洪武初有司累薦其才辭疾不赴年八十三猶執經史爲人講究子甯通詩經善吟詠隱居養親著有詩集

楊諶蒲州人從薛瑄學以真知力行爲本洛陽閻禹錫見而奇之曰師門有人矣

荆詡猗氏人幼穎悟善讀書弱冠與兄志鸞同受業薛文清公文清嘆異之正統丁卯舉於鄉卒業北雍官臨清州同知以慈惠著祀名宦孫晏以貢生官茂山衛經歷亦有學行

王珂蒲州人正德間舉人卒業成均時詔纂修武宗實錄遂膺首薦嘉靖丙戌成進士授中書舍人命侍經筵多所啟沃

嘗著自省篇楊少保博稱其議論切實與濂洛關閩相爲表裏編修張四維爲之註釋

張煇字淥汀蒲州人舉萬厯辛卯鄉試授華陰教諭遷國子監助教外轉鄖陽府同知爲主者所忌罷歸煇博學能文願獨刻意躬行侍大父母及父母夜漏數十下始就寢居父憂寢苦柩次三年如初喪時教人以主敬窮理爲要嘗攝守鄖陽兼竹山令革做政十二款歸後讀書談道不輟所著去浮集四禮約四書臆見讀書日記聞見隨錄學者宗之

荆芸猗氏人萬厯間貢性好學尤篤嗜性理宗陸象山涵養之說仕陝州訓導著春秋要旨

衛庭芝字德馨猗氏人萬厯中以貢授阜城訓導生平潛心道學必從人事實地體驗嘗創修族譜病中猶手訂訛漏不

輟子邦勳字汝弼亦歲貢歷代府教授以易學名

以上蒲州府

李新芳字元德潞州人嘉靖癸未進士性剛介寡合燕居危坐如對神明嘗有句曰身心無可告天地面目如何對聖賢釋褐後歷淮安保定府推官胥以廉明著入爲戶部主事改監察御史出按真定鋤強伸枉風裁凜然尋爲忌者所中罷官歸杜門讀書從遊日衆達官貴人皆稱漳野先生

趙初黎城人性嗜學重行誼薄紛華隱居田溪之陽創蒼溪書院以讀書著述爲事建聖賢道統堂春秋率子弟行釋菜禮呂柟過黎城聞其名命駕就訪與論辯終日嘆美而去申尙德潞城人事親以孝稱學有根抵崇禎初以歲貢上書闕下陳聖治聖學拔本塞源諸論不省歸而閉門讀書從事姚江之學著格致源流以表章之又輯青解以解大學斐園

臆鈔以解中庸並鄉黨訓孔氏世醫說諸書

李瑤屯留人父思謙官通守以清介著林居後讀書課子以終瑤能承其家學潛心玩索天啟間以貢任高平訓導秩滿遷陝西紫陽縣尋歸端居一室繹聖學指趣嘗曰尋未發時氣象此古人扼要所在學者所宜留心也子鍾進士孫楷舉人皆能世其業

以上潞安府

馮思翊汾陽人隱居讀書聚徒講學孔文谷王文翰賴君恩等皆出其門

汾州府

李聰沁水人景泰癸酉舉於鄉以孝友稱厯鄠縣慈谿訓導凡經指授悉有條理嘗訓學者曰爲學當以體驗擴充爲主一時士類務尙實學在官二十年多所造就致仕歸自託於章縫書史間遇事卓有裁制而禮度自嫻彬彬有古人風

尙甯一沁水人少慕嚴君平自號希平親亡建永思堂朝夕
奠弗倦避寇亂負木主行歸置祭田百畝義田五十畝訪辛
全於絳州同韓青州居櫟山多所考究崇禎時辟博學真儒
不赴隱厯山以終著修齊格言百卷女則五卷以上澤州府
王汝浹字見田懷仁人愛恆山名勝卜居渾源積學能文嘉
靖甲子舉於鄉屢試春官不第遂行吟泉石間貧不能具饘
粥不爲請謁人以是高之

何嚴師大同人性孤介力學能文章與兄餘師齊名以貢判
邠州卒子廷魁萬厯進士

李橫大同人天性孝友篤學高行天啟間歲貢任平定州學
正士多造就

劉賢山陰諸生遠方弟子爭負笈貧者束脩遺之不受也後

以貢任眞定訓導漳縣教諭固原學正歷二十年冲和之氣

可掬士多造就有古師儒風範焉

以上大同府

郭世祿字介軒威遠衛人萬厯間以貢授醴泉教諭莊重不

佻士多造就著戒士勸學諸訓

朔平府

朱遜沁水人宣德間舉鄉試第一官乾州學正志趣高潔棄

官歸優游林下閉戶嘯歌二十餘年號南石居士

沁州

王逢字原夫樂平人博極羣書不爲口耳學從洪野谷窮究

元本與吳存何英余進諸人以理學相砥礪永樂間廷臣交

薦不起宣德嗣位熟逢名授福陽訓導亦不赴已復以明經

强起之召見便殿論禮樂娓娓數千言次日復召見問鬼蓋

字不對徑辭出歸臥蓬戶甕牖間終其身學者號松塢先生

李應箕平定人初受業於高陵呂相壁書志顏學伊四字相

曰李生少年質美篤志於道何患不到聖賢地位授狄道知縣與典史楊繼盛並以名節相高父雙崖卒於任所貧僅舉

槐謝絕賄賄人稱爲孝廉

以上平定州

郭瑄定襄人參政麟子永樂辛卯舉人麟官開封時與薛文清父貞同官瑄因與文清爲文字交潛心性命後官左春坊左贊善

李樸字淨芳靜樂人潛心理學凡有益身心之句書壁觀省年久成快縣舊無志樸始創稿焉萬厯間以恩選爲成都府通判蒞事五載士民有止喫越得水之謠

袁憲字文震靜樂人少聰穎十一歲補諸生能治五經尤深於易來學者因材受經門下六十餘士五經備焉時號全經夫子後以貢任唐縣知縣

以上忻州

李景安邑人受學於薛瑄蘭州周蕙嘗從景學學益邃蕙由舉人官清水教諭學使者嘆其賢薦景代已命未下而卒

王光祖解州人貢生遊呂涇野之門精思力行潛心理學不治舉子業涇野轉官南都負笈從之涇野嘆其篤信好學既歸築室祀先聖賢讀書其中題曰明誠精舍所著有龍居子稿文見三晉語錄

崔吉字天祐平陸人簡重莊慤雖貧不苟取惟以講學授徒爲事嘉靖癸未貢入太學一時同遊士翕然重之司業吳高其行欲薦諸朝對曰是非吉初志也比居憂六載哀毀柴瘠未嘗一入閤內授華州同知巡道王屢以疑獄檄聽悉得其情出理大慶盡祛積弊有羨則歸之公中曰吾求無愧此心而已遭疾卒無以爲斂當事給賻歸其喪

劉崇文字朴菴安邑人舉隆慶庚午鄉試萬厯戊戌成進士雅嗜讀書讀輒成誦有所解悟輒以登牘轉遺知友家貧躬耕自給及通籍厯官銓曹自奉如寒素云

姚檀安邑人萬厯甲午舉於鄉幼慕河汾學博覽羣書朝夕不輟坐當兩足處雙趺隱然言動必以規矩非其道義一介不苟取與以母老絕意仕進推產讓兄約已及物日與同志數人講求性命茅茨土几蕭然自適吳撫軍仁度嘗表薦其學行詔徵之力辭不起

裴鶴章夏縣人天啟丁卯舉於鄉其學務讀書窮理期於力行與曹真予友善著述甚富學者師之

郝本彰字顯吾安邑諸生事繼母以孝聞博覽羣書安貧樂道講學宏運書院曹真予友敬之

裴嶢字竹溪夏縣人嘗從曹真子辛復元游習聞忠孝大義事親得歡心居喪哀毀廬墓三年性澹泊村居幽僻蕭然自得間著書以自見然非其人不出示也

以上解州

李彥英絳州人洪武初博訪天下通經學古士使主師席門人高鐸時爲僉都御史以其名上授平陽絳州兩學訓導端正有師範勤於訓誨一時登甲乙榜者兩地爲多人稱五經夫子

薛貞河津人舉洪武甲子鄉試授元氏教諭職滿赴闕太祖詔擇儒官可備顧問者吏部以二十人上貞與焉嘗進講尙書大禹謨意義曉暢太祖稱善尋授滎陽教諭改馬湖府長官司吏目邊地僻陋人皆獠類貞結茅以居饔飧不給泊如也永樂初復任滎陽教諭改鄢陵九年徙河內未幾卒子瑄

見鄉賢

楊潤河津人少從薛文清學稱高弟景泰癸酉舉於鄉授涇陽教諭循規植矩有人師稱擢國子監監丞祿薄不能迎養因悉舉俸錢以奉父而自甘澹泊云

周盛字文茂河津人孝友謙謹以歲貢官保安州吏目廉直有聲告歸安貧樂道優游以老嘗受學於薛文清公卒後值建文清祠縣人舉以從祀

陶梓絳州人嘉靖甲午舉於鄉知睢州遷兩浙鹽運副使卒於杭舉櫬過睢士民哭奠留二日始得歸梓德性溫雅平生無疾言遽色師呂涇野得身心之學

翟期古聞喜人萬厯中貢任濮州訓導闢經課業羣弟子蒙其教育多有成就遷同官教諭抵家不復出益究心儒先之

書僻處村塢手不停披非至公不履闕閭有古君子風

李儁字明海聞喜人孝友恂謹年七十母景氏猶健在晨昏問視如兒時以貢歷陵川訓導太谷教諭靜甯州學正躬行誨士爲提學特賞平生事祖先尤嚴諸鮮物不薦不敢嘗燕居如對賓客書言忠信行篤敬於紳以自勵人稱爲眞孝廉子振圻崇禎間貢介休訓導

李儔字養高聞喜人崇禎中貢孝友端良澤躬爾雅士林尊爲師範年益勤於讀兼精韻學從遊者皆知聲律年八十四無疾卒

文顯道字子行絳州人諸生遊辛全門講學明道好勸人爲善人稱文夫子又車國幼事辛全有篤實君子之譽劉澤長字恆齋公府之中遇冤抑婉爲申救聞辛全講學忻然從之

著劉子俚言

以上絳州

朱可大字受之隰州人遷臨汾幼業儒以貧糴貿易陝州從王惺所遊得聞正學居親喪哀禮兼盡訓子姪以義方後惺所宦遊平水問學外無陳乞惺所卒服心喪三年

隰州

李德霍州人講學於其鄉及見學正曹端退語諸生曰學不厭教不倦曹子之盛德也至其知古今達事變末學鮮及之古云得經師易得人師難諸生得人師矣遂避席去端高其行誼命諸生延致之曰進於道

霍州

右明五十五人

又二十八人附見

國朝

崔嗣達字季通陽曲人順治乙酉拔貢安貧不仕學問淹博而恪宗程朱闢變時兄嗣遠夫婦殉難撫其孫秉鉞登賢書

程雲鷺徐溝人研窮理學身體力行由戊子舉人授蔚州學正魏敏果公方家居傾心相結時以道義相切劘遷咸甯知縣甫一歲卽罷歸家居十餘年卒學者宗之

王彬字中軒陽曲諸生事繼母以孝聞父志曾故廉吏宦齊歸喪殯時不繼彬授徒奉養與弟妻以名節相研礪敦行績學至老不衰妻由進士官澤州府教授潛心河津薛氏之書晚年病目猶誦習不衰

孫揚淦字立公興縣人雍正甲辰進士官國子監監丞未幾罷歸揚淦才高學博與兄文定公嘉淦齊名側儻喜議論時以直言干忌文定屢戒之而不能自己卒以此與時忤旣歸乃益究心古籍及先儒之書時康太守忱尹學博京衛胥家居相與講明正學後進從之遊者兢兢以植品立身爲先務

得其指授後多爲名臣純儒年七十卒世稱石橋先生

王德讓字謙光陽曲人幼孤貧偕弟力學苦志潛修敦篤內行舉雍正丙午鄉試謁選授桐廬令勤政愛民有王青天之稱縣北富春山巖子陵釣臺在焉其下出魚甚佳上官索之不應卒以迂直見忤被議降補臨晉教諭寒氈安坐講讀爲樂視人世浮榮夷然不屑也職滿告歸家居仍以授徒自給處困益堅人高其行

羅光瑗字衛玉祁縣人篤於孝友博通經傳雍正壬子舉順天鄉試風格峻整足迹不履公門接引後進則孜孜不倦

賈六榮字肇封陽曲人少穎異十五以五經補弟子員孝事繼母奉兩兄終身依依雍睦無間由己酉副貢除平陸教諭戀親不仕優游山水惟日以文行啟後進著有山木堂集子

景誼乾隆丁丑進士

張思孝陽曲諸生學識淹博植操端謹家藏書籍甚富閉戶誦讀心與古會荆溪儲畫山主晉陽講席授以所學畫山歸後十年思孝千里往詣值其病革取所著研樓集授之而瞑思孝爲持心喪不去校訂付梓一時荆南人士高其行誼以百泉易堂諸君子相況又以餘資刻鄉先生傳青主魏環溪遺書卒業始反晚年造詣愈粹後進來謁輒爲講授忘倦云王志匡字一菴陽曲人乾隆初拔貢性嚴正每與人論文作書雖盛暑衣冠肅然無跛倚容蓋子戾夫見之皆爲起敬後官孝義訓導勸諸生以立品制行爲先傳其學者皆有法度云從子新祚領庚午解額官教諭

郭光斗字文萃興縣人乾隆辛酉以選拔貢太學考授教習

親老乞養歸遂不復出爲學潛心宋五子書以躬行爲本雖
燕居必危坐夜則省所爲得失居親喪致哀盡禮與人和藹
款曲言依孝慈無少長皆樂就之而中之所持耿耿自信一
介不苟暮年嬰疾每朔望猶躬率子婦展家祠如常其積誠
若此子五履恆壬午舉人餘並諸生

陳璵字仲玉祁縣人乾隆丁丑進士篤於內行自以剛直不
諧時宜不復出仕教授鄉里以終子之儒乙酉舉人能傳其
學礪節砥行粹然一出於正謁選授壁山知縣下車卽闢緒
雲書院力興文教尋里吏議解任壁山人留主講席未幾卒
羣思之不置立祠祀焉

張天植字潯柏陽曲人丙戌進士授永安知縣調繁番禺遷
宜昌府通判母憂歸未幾以事註誤落職家居貧甚飢鄰居

授徒其中自號六有居士取橫渠畫有爲宵有得六語也渭南蔣撫軍兆奎同年也時守太原未嘗輕謁泊撫晉延主晉陽書院講授之暇杜門卻掃深自撝抑未幾辭去操行廉介始終如一卒年七十三素工楷法而不輕爲人作得其片楮皆寶貴之弟天爵字古修壬辰進士官合江令遷同知亦以廉稱

康廷傑字俊卿興縣人乾隆丁酉舉於鄉少讀書不喜涉獵每謂聖賢以體諸身者著爲語言文字學者仍以語言文字體諸身方信古不我欺學乃有獲由大挑宰浙之仙居每聽訟務期曲達下情遇士子則以身訓久之訟簡刑清相處如家人父子一時以儒吏稱之遇歲歉不忍徵比得下考降妙山司巡檢卒

閻立誠交城人乾隆中三登乙榜遂不復試以貢選孝義教諭學有根柢多士奉爲楷模卒於官貧無以歸交人爭賻之著有彞園存稿

張博字靜淵交城諸生家貧力學事親惟謹授徒鄉里時以孝弟忠信誘掖後進晚歲善醫出技濟人有以金幣酬者輒卻之

張琬字玉叔交城人少負雋才好讀書尤邃於易莫寶齋侍郎視學時嘗選高才生二十八人親課之琬與焉其後以科名顯者二十六人惟琬無所遇以歲貢終著有四書講義周易獨見等書臨卒取其稿並所作詩文悉焚之

以上太原府

衛蒿字匪莪曲沃人初名麟徵字瑞鳴尋以母喪易今名字嘗主衛文清塾及賈中丞自秦撫歸築義學訓鄉人子弟延

蒿爲師蒿雅善說書聽者豁然心解問業士履滿戶外今晉人所傳四書答問是也久之不樂棄去已復往來絳山平水教授生徒以爲常蒿學無不窺而持論頗嚴進退以禮有古君子風

田雲太平人前明歲貢生嘗應師儒舉安貧著書以老雲少嗜閱覽涉獵百家一日讀薛文清讀書錄慨然曰道在是矣手一編所夕玩索不少輟建宏孝書院與同縣賈中屈擢升講學肄業者戶外履恆滿其學以曹辛二人爲津途而沂源於河汾著安邑性宗絳陽正傳以示學者賈著衍易全書幽人心聲屈著隨見錄與雲胥稱耆儒云

和鳴喈字爾音翼城人前明已卯鄉薦順治中任武陟知縣又知鄆水兩地遺愛久而不忘中年解組歸足跡不履城市

講學論道主盟文社者四十餘年

上官鉉字玉鉉翼城人順治己亥進士性孝友有文名好獎
勵後學任太原府教授日與諸生講學課藝非周程張朱不
以言著有四柏軒集

王之旦字元夫曲沃人舉庚子鄉試旋成進士授贛榆知縣
卒於官之旦意氣縱軼目炯炯如巖下電初爲姚江之學無
所得讀薛氏讀書錄繼數行躍然起曰道在是矣嘗謂學文
清者當以誠入以敬成著日新編魏敏果公象樞極稱之里
人蘇加誠鰥居養母爲人傭不受直曰但飲食老母足矣之
旦爲授室焉官贛榆表揚善行如不及民風爲之一變甲乙
間蝗旱禱輒應以勞勩成疾有老嫗數十輩長號衢中祈令
尹長壽贛人王庸功纂野史紀要書其事

賈佩徵字賓臣曲沃人幼學於柴明經茂徵嘗萃四子書論仁章精思者三十年康熙癸卯舉於鄉授太原教諭月餘卽具揭乞休曰教諭一官雖係閒局風勵學校厥任實重今士習競義利罔辨一旦得志於時治術卑汙流毒生民皆校官衰耄昏憤訓迪無道又復耽戀爵祿不能引身而退之罪也某老且病曠職是羞祈放還田里俾得心安遂拂衣歸臥東園之雪龕年八十二卒學者稱雪龕先生

喬昌齡字允公浮山人舉壬子鄉試性穎悟奮志於學尤潛心濂洛關閩之書授沁州學正砥礪廉隅勤於訓課士習爲之丕變時塞外軍興轉饒大同當事委任沁州米運規措得宜事集而民不擾沁人傳頌不衰

羅維藩字价士襄陵人壬子拔貢博學能文著四書釋旨有

功傳註授興縣教諭未任卒

趙鴻運字叔漸襄陵歲貢持身端嚴立品高卓步趨不踰準繩而尤精文藝纂修邑志多所考訂

張鍾萃字嵩生曲沃人少服賈年四十餘聞同里衛蒿講學務以躬行心得爲要心樂之遂棄業同游與蒿季子廷亮特善朝夕砥礪不事口耳鄉里服其長德

王端字子方一字任菴翼城人生八歲而向學十二能爲文十六有志於聖道獨行獨勉二十四而粗見大略又二年病失明乃益厲於學耳聞而口誦之所詣日遠著有學思錄

縣李懷裕劉昌祚從之學端作定性倡學序稱其爲人敦篤忠信可與言道助予以倡後學云其後唐鑑錄入

國朝學案謂端之學以思得之養其心以合乎理定其性以

全其天以一盲者不敢自廢成已而卽以成人斯何如其志願何如其識量哉

靳之隆字豐齋洪洞人雍正甲辰舉於鄉選永福知縣未任尋充乙卯河南鄉試同考官改解州學正憂歸年七十登乾隆壬戌明通榜授陽城教諭潛心理學日進諸生講明切究以倫紀爲先文藝次之士風爲之一變大府重其名使攝縣事尋告歸築精舍曰無逸所遠近從遊者因才成教後多知名戚里中有爭競每來就質得其一言無不立解著有無逸集

齊諱字儁生浮山歲貢嘗肄業南雍興縣孫文定公蒲州崔南有中丞先後爲祭酒推其學行各賦詩贈之和者百餘人授汾陽訓導日與諸生講明正學在職清苦卒之日至無以

爲歛郡守張表其靈曰古之君子偕同官經紀其喪資以歸
趙思植字培元太平人孝友醇謹以選貢授襄垣教諭遷大
同右衛教授在官能舉其職移疾歸雍正年

詔知縣各舉一人會稽令張我觀夙以行誼推重欲以其名
薦固辭存心利濟尤敦於師友之誼勵志篤行至老弗倦有
詩集行世

雒潤字秋水臨汾人天性高邁銳志於學不問家人生產敦
篤內行居親喪哀毀盡禮授經於外遊燕趙往來代雁門太
原間所交皆一時名流學益進累舉不遇以諸生貢太學司
訓祁縣缺裁改定襄訓導勤於啟迪尤精賞鑑所至士爭趨
之問業者戶外屢恒滿方正自持不喜干謁而神采英異記
問博洽傾動一時撫軍明一見器之將與學使會薦以年老

辭生平於經史皆有論說工古文詩著述甚富散佚無存
劉居敬字翼長襄陵人性穎異讀書務索體要爲諸生有聲
場屋乙未以優行貢太學祭酒蒲州崔南有父執也留主教
習以母老辭及選官得左雲訓導復辭奉母終身母沒廬墓
咸稱篤行君子

王楷通字章揆洪洞人性樸謹淵深沈愷爲學能見其大於
書無所不讀教人務躬行不以言先迥異咕畢果試不遇循
序貢太學嘉慶戊午以

恩例準副貢事親盡孝大母邢奉佛持長齋楷通進甘旨卻
之乃請代爲茹素而腆洗致養邢憐其誠爲罷齋語默動止
皆有矩矱卽素稱理學者弗能過然終不以理學自居年七
十五以壽終

祁宗孟字淑菴曲沃人乾隆壬申進士官潞安教授志潔行
方博覽羣書與生徒朝夕講貫造就甚衆既歸囊橐蕭然惟
先世遺田半頃令諸子課農以供餽粥年逾七十卒

王履浩字子充太平舉人事親以孝聞慕范文正爲人以天
下爲已任於古今興廢大義皆探其源流家居義舉甚衆未
仕卒所著有聖虞纂言左兵中說粹皆未卒業云

王冲翰字際雲太平人性端靜沈浸古籍敦篤內行與人交
始終以誠遇困阨必委曲相濟爲學博而得要嘗曰不讀經
傳無以探性命而貫天人不閱史鑑無以擴學識而鏡今古
研窮至老不衰嘉慶間舉孝廉方正同時尉涵字永昌繁峙
訓導衛青鯤字次輿並以學行爲後進宗仰

李重遠字耐軒浮山諸生讀書窮理務求心得不輕著述嘗

云聖賢之書教人行非教人言也生平端方嚴正皆以純儒目之

張恢字充軒洪洞人幼有至性事親孝侍疾居喪竭誠盡禮居恒以分所當爲職所當盡自勵名其齋曰兩所當軒道光中以歲貢司訓潞城訓迪諸生一本所學羣告歸教授鄉里以終其學以宋儒爲歸而務博覽恥爲空言嘗校定范徵君理學備考補其殘缺所著有周易觀象玩辭聖廟全書困學一得察習隨筆十三經傳授圖校正等韻兩所當軒文稿緯亭詩草廬山詩草及蒙養編本務篇天文指掌歷代地輿沿革等書

吳克成字省圃襄陵人積學淵深渾躬爾雅由拔貢任武鄉教諭勤於其職有實生者才而貧親沒不能葬召之來學助

以金俾治喪時以爲媿美麥舟云

史作哲襄陵人歲貢性純孝善養親志潛心理學得濂洛奧旨邑人稱爲貞靜先生

傅田字經翁汾西諸生安貧守志循規植矩以儒先自律造次一軌於正或笑其迂弗顧也將卒猶爲子姪講素位義端坐而逝

以上平陽府

喬虞建猗氏人前明甲子舉於鄉幼孤事大父母以孝聞對子弟僮僕冠服必整甲申逆闖逼縣士人脅於威相率迎之獨避匿條山不出後檄授僞官堅辭不就其大節如此順治中選樂平教諭課士有則尋以年老致仕著有四書淺說刪補子震蕃丙戌進士

郭九會字繹茲猗氏人性警敏嗜學有所事輒袖書從造次

不廢讀舉康熙己酉鄉試第一官臨安知縣爲治嚴勤俗健
關多訟爲之一變解組歸手不釋卷指授後學不少倦臨卒
舉杯自酌朗吟杜少陵自知白髮非春事二語而瞑倚然於
去來之際如此

王含真字樸齋猗氏人幼穎悟工文章舉康熙乙卯鄉試明
年成進士以父老不仕內行修飭與人言率本經訓會
詔舉博學宏儒辭不就父促之乃行試畢卽日馳歸父卒哀
毀骨立服闋謁選入都遽卒邑人胥爲流涕

杜先乙字少青猗氏人潛心性理之學著四書理解易經講
義由歲貢歷太原訓導噶縣教諭甚有師範學使徐雅重之
欲令其子補諸生戒子勿與試人服其介

陳洪度字一菴猗氏諸生家貧授徒自給委心任運嚴於義

利之防嘗曰觀物如朗鑒守口如覆瓶受人如冬日防身如履冰人以爲不愧所言云

王洪浩臨晉人嘉慶戊辰進士臨謹嗜學淡於仕進選平陽府教授故事郡庠諸生具贄而不習謁慨然曰是以市道交也悉召之來願學者訂期講授教人以宋五子爲歸而取徑於河津薛氏先躬行而後文藝舉業以餘事及之歷十餘年孜孜不倦一時尊爲人師歸後生徒往來不絕於家同時張佩芝以舉人司訓懷仁性嚴正動作以禮從之學者皆循謹有法度邇縣朴鄙之習爲之一變

陳賓鎬猗氏人道光乙未舉於鄉家貧事親克孝好讀書博聞強記聲名籍甚設教太汾間脩脯所入奉親外以興成黨而妻子布衣蔬食時或不足治家整肅閤門之內從無諍語

邑中公事經其董正莫不就理官紳皆拱手受成選甯武教諭郡中才士多從之授經太守議修郡志令屬業焉以老乞歸篤學力行與年俱進羣以耆儒稱之

王庭蘭字瑞階臨晉人少孤受學於兄事之終身惟謹舉道光丁酉鄉試司訓五臺遷平陽教授與諸生講學一依鄉前輩陳氏遺規品端行方一時遵之

王鶴齡猗氏人少時貧甚晝耕夜舂食力養親溺苦於學六經諸史以及詩古文靡不研究以諸生貢太學鄉人士多從之問業及門二百餘人爲之起廬買田旣而兄議析爨勸之不可則盡以腴產讓之硯田數畝不供饘粥宴如也鄉黨皆欽其行

郭薰字譜南榮河人嗜古力學內行純摯受知於莫賈齋學

使以選拔貢太學鄉居多行誼析產讓豐居瘠里有困貧鬻妻者出金贖還之薛文鴻歲貢亦以學行爲鄉里推重性端嚴家法整肅婦孺亦嫻於禮鄰婦出遊憚爲所遇至令兒輩環伺之門

牛維斗字星堂戊子舉於鄉官嵐縣訓導事親色養備至居父喪嚴冬晝夜苦次哀泣踰三月毀瘠幾殆博學強記涵養深醅授生徒諄諄以孝弟爲訓故出其門者多循謹有士行周原榮河晉民也博通經史晚年潛心理學書錄先正格言及所自悟者時檢閱以自鏡著有河圖解星宿考檢身集同時王敏郭嘉祥並以諸生貢成均勵學植品卓絕流俗皆爲後進所宗

以上蒲州府

李呈秀字燦堃長治諸生學問宏深屬詞簡易其教人務躬

行實踐不徒事章句遊門下者多知名士子中白與館選時
卽貽書曰品行乃服官根柢宜自樹立爲經濟地勿徒事浮
華也人以純儒稱之

李嘉美字溫又長子人康熙戊午舉於鄉家貧力學著作甚
富任霍州學正課士論文無間寒暑學者宗之同時李佺以
副貢官懷仁教諭能勤於職諸生爲輯德教錄頌之趙奇字
九如拔貢威毅嚴重著有斗圍草亦以學行見推於世

田丕績長治諸生以學行重一時守令多旌禮之學使勵按
試潞學令所錄九學新進皆向之拜目爲人師

栗千春字端子長治人性純樸嗜學購書千餘卷寢食其中
著有四書集解讀書輯要諸書由歲貢選靜樂訓導以老辭
不赴子溫拔貢亦有學行孫陸昆舉於鄉

程經字九一長治人雍正初歲貢授左翼訓導和平端正誦
法程朱與縣人張澤溥並以理學名澤溥字湯若亦歲貢
馮文止字子靜盩厔人舉乾隆己卯鄉試第一癸未成進士
由平陸教諭補河東運學教授移疾歸旋檄取知縣不就潛
心性命之學造次必循規矩非道義一介不苟取識者謂有
宋五子氣象一時從遊者甚眾嘉慶初

詔舉孝廉方正邑中咸擬以應聞之力辭有詩文集行世尤
工制舉文己卯領解出紀文達公門文達爲序而刻之
劉岳字仰止長子諸生自少負文譽應舉不得志絕意進取
專心正學晚築雙柏堂課子作積善論戒淫文以警時人化
者甚衆人稱雙柏先生

王師寬字文卿長治人好學踐履篤實著有大學中庸精義

詳解以歲貢終

王信賢字尙之壺關人少貧溺苦於學文譽課一時館申太守瑤家多見異書而篤嗜宋儒之學最深於易嘗言讀書人當完讀書人面目若徒以文士自命無足觀矣故其平生踐履篤實於人世榮利視之泊如道光壬辰舉於鄉不復求仕隱居教授以終嘗佐縣令茹纂修邑志卓節奇行多賴以表見云

王繼恆字成性壺關貢生居家有孝友稱教授生徒以植品爲先嘗曰讀書與聖賢晤對須心體力行非特爲榮世計也故遊其門者多有法度嗜學至老不倦年踰六十卒

王令德壺關人道光甲午舉於鄉性恂謹動止必以禮法自持主講書院十餘年時以讀書立品激勵後進造就甚衆咸

豐元年

詔舉孝廉方正當事欲以其名應勸駕甚殷卒辭不就

靳富字懷古長治人幼負才名試輒高等累舉不第乃慨然有志於性命之學聚徒講授娓娓不倦已復病其空疎與邑人常煜設五經會研究古義一時翕然從風黎城王綺作序贈之稱其能得先儒之精萃云由恩貢選汾陽教諭未之官卒

以上潞安府

董弈先介休人順治己亥進士授平陽教授遷國子監學正研先儒書以持敬爲本雜采鷲湖鹿洞條規分十則用訓多士所著書曰主敬編子振祖由拔貢爲太谷教諭擢知霍山縣有惠政終工部屯田司主事

薛登五字逢年平遙人天性純篤文學邃密孝友之聲無間

里黨以優行貢太學主講書院教人以敦倫尚實爲要論文亦別裁僞體一宗雅正承其指授皆有聲庠序雷大震廩貢亦以經明行修爲後進師承

丁歲春汾陽諸生事繼母以孝聞家貧苦學治經有法達於名理雍正中學使勵按臨至汾令九學新生卽堂下再拜奉爲師其見器重若此所著有四書撮要周禮正編內則列女傳四言訓詞等書其徒悉珍藏之子運升乾隆丁卯舉人郭意誠字太箴汾陽人少以學守自勵乾隆庚子舉於鄉從事小學之書雖盛暑必衣冠處內室亦自飭鄉里呼爲郭正人居親喪一秉禮經著有齊民日用錄

段應元字春溥汾陽人乾隆己酉舉於鄉官陽城教諭與諸生約有遵朱子小學身體力行教生徒有成效者舉優行士

爭自濯磨習爲丕變性良厚扶困濟危助戚族婚葬恤故友
孀孤皆力爲之嘗言人當培養元氣或請其說曰心中過不
去處便是元氣少覺不安卽勿爲之便是培養其平易近人
若此子可傳負備才工詞賦嘉慶十六年

西巡

召試舉人

卞爾琬字玉光汾陽舉人官聞喜教諭嘉慶乙丑

欽賜檢討致仕歸卒年八十八性肫摯博通文史在聞喜以
育人才敦名義爲已任邑人士爭相淬厲著有敦古齋集

王廷槐字兆公汾陽人爲諸生潛心性理闢亦政草堂聚濂
洛關閩及元明諸儒書讀之論學主於窮理知行合一而以
事親從兄爲入德之基進修之鵠居恆周規折矩言動俱有

繩尺以選拔貢太學隱居不仕著有論語釋孟子類編因遂齋格致編千田字子耕歲貢傳其學著詩經叶韵正誤左氏傳類編唾餘草終於平陽訓導

楊國泰字定軒甯鄉人舉嘉慶戊午鄉試幼孤事母至孝家貧躬耕爲養力作之暇輒取經史伏讀溺苦至忘寢食鄉薦後一肆力於性理經濟之學選授太原教諭職滿擢廣西州同未就所著有春秋合璧及豹班集

以上汾州府

竇載德沁水人幼從王英學英卒每春秋備物致奠中年棄舉子業究心儒先語錄月朔偕族父世英集廟學講經辨王霸誠僞之分立童子學旬日令一鄉童子謁廟行禮背誦小學與日記故事發其良知年饑約里人日出米若干以賑鄉鄰名爲減竈頭米多賴以生又做朱子社倉法勸人出粟積

貯爲備荒計年七十餘以微疾終

牛崇文字吉人乾隆乙丑進士歷臨朐堂邑鄒城知縣以母老乞養歸生平于書無所不窺而退然如不足在官無赫赫之名去則每係人思邑宰延之主講書院敢迪後進務以身教道氣益然甚有師範

王祿書字行南鳳臺人績學工文卓犖有志節嘉慶戊寅魁於鄉選臨汾教諭周恤寒畯出資助讀親爲教誘士咸感奮橫經者至黌舍不能容遷蒲州府教授尋告歸閉門卻掃守令欲一見不得與生徒講授以終

武威遠字安亭陵川人歲貢敦品砥行以嚴正爲閭里所憚滑縣之變匪黨時逸入太行令議守城威遠言誠力扼山隘則城守自全且四鄉生齒百倍於城棄而不顧卽令彈丸得

保其所全幾何耶卒從其議於是賊西竄路窮盡爲官軍所殲縣中額賦舊多浮收言於令並革其弊其強毅有爲若此武彭齡陵川人博聞多識居恆以古之學者勗人嘗言處世須明喫虧二字讀書當體喫苦二字於邑之文獻留心搜輯著述頗富身後散佚無存以上澤州府

楊得字動菴大同人乾隆戊子舉於鄉爲學宗近思錄身體力行一言動必秉成法厯汾西訓導再補臨縣教諭值歲祲襄辦賑濟實惠及民府大同

郭傳芳字九芝右玉人父之麟明季官九江府同知殉難傳芳時家居學業有成冒險行聞關兵火中力扶父柩以歸舊侍郎秋岳嘗稱其學行與徐化溥爲雲中二士由選貢授咸甯縣丞與修陝西通志厯署邵陽長安知縣所至有聲遷知

富平吳逆之變王輔國據平涼叛應之其黨來犯傳芳乘大霧徑搗其巢斬賊首二人獲偽劄三十餘紙舉卓異賜袍服嗣遷達州知州到官市月病卒貧無以爲斂僕從亦繼死後十餘年子荆石始克以喪歸著述散佚無傳

周鼎望朔州人學問淵博性情樂易處閭里睦嫻任恤人多德之並精書法沒後州人私諡曰文懿先生

蒯永琚字世符朔州人康熙丁丑拔貢天性孝友質實無僞不爲崖異蘄絕之行其與物薰然以和雖庸夫孺子無不敬而愛之讀書邃於理學人以篤實君子稱之

以上朔平府

魏容大字仲似武鄉人明太康殉難知縣令望子也天資穎異肆力於學經史子集無不汎覽下及方名技藝亦皆究心而窮原本而自爲諸生卽從袁臨侯講學故所造詣一以濂

洛爲歸居鄉留心於民生利病如豁除荒糧改輸屯豆皆力
持議得如所請人德之由歲貢選河津訓導課諸生先德行
後文藝咸服其教以老乞歸日與耆舊爲率真會間作詩歌
自娛年七十三卒

李秦沁州人父星一倜儻任俠爲仇誣陷秦年十九破產額
救飯糗水衣襤褸歷六年志不少挫擊登聞鼓始得直脫父
於獄發憤力學雖患難奔走研究經義造次不廢及父沒哀
毀廬墓州守汪宗魯將舉其孝固辭晚益斂抑以禮自持累
舉不遇以諸生終與吳文端公同時祀入鄉賢

李其寬字先民沁源人少爲名諸生孝友睦婣甚有聲譽雍
正中

詔舉賢良方正縣人以其名應不赴循序貢太學年七十九

授孟縣訓導職滿大府皆驚其夔鑠稱爲人瑞堅留之任又五年壽九十竟卒於官

吳正字聖功沁州人文端公孫也少聰穎書一再過輒成誦爲諸生名藉甚願恥以文士自表見恭儉好禮父憂哀毀幾滅性事繼母以孝稱舉雍正壬午鄉試癸丑成進士以知縣需次於家大府延主晉陽書院一時名士多出其門生平以立誠爲本言物行恆經史百家無不淹貫待人恂恂然未嘗有疾言遽色人自敬而畏之自奉甚儉至於扶危濟困嘗若不及遇歉歲節縮衣食周道路之饑寒者以故窶人子常盈其門家居不輕謁官府或以公事相見惟談文論古道民生疾苦未嘗一言及私晚年益好靜手一卷昕夕自娛體安氣和望而知爲有道者年七十六卒子嘉炎進士官普甯知縣

李松歲字壽堂沁州人性敏慧篤學勵行乾隆壬申舉於鄉
大挑知縣以不樂吏事改就教職授代州學正勤於課士時
王制軍秉韜方爲州守論學相得值歲歉煮粥賑饑卽令主
其事躬親散給實惠及民州人孟某遭奇冤論辟松歲訪察
得其實以語王方覆訊而勾決之旨已下卒平反之職未滿
以老告歸家居喜成就後進其學務躬行實踐篤於人倫恥
爲口耳咕畢聞其緒論多有激發而興者年八十五卒同時
舉人張孝揆字藻亭亦以學行爲士林推重兩舉孝廉方正
皆不就

趙擴字充之武鄉人乾隆乙酉舉於鄉由大挑授榮城知縣
有惠政年末五十卽謝病歸抵家不名一錢授徒自給州守
劉欽其品望延主銅鞮書院生徒甚盛去官已十餘年忽以

虧空事倣赴山東卽攜少子昌祚就道旅舍蕭然僅具饘粥
濟南德太守雅重之語人曰世烏有乾沒侵漁而貧病如趙
君者乎事白得歸貧益甚而志行高潔精神堅定游心典籍
未嘗以之撓情有以著書諷者則引前人使我有身後名不
如生前一樽酒語謝之其委心任運隨遇而安若此

趙文振字起齋武鄉人舉乾隆己酉鄉試幼負異才不受塾
師束縛父怒閉諸深室於做牕中得史記殘本讀之大喜踰
月成誦沁州吳香山孝廉聞而異之召入門下孝廉故文端
孫也家多藏書遂博覽強記爲通儒事母甚孝母晚而折臂
侍飲食躬親進匕箸三年如一日及居喪晨夕苦次每食必
奠旣祥猶偕弟誦讀總帳側不入內寢營窀穸必誠必信設
教里中脩脯自給外盡以賙貧乏富人子有從學者值州試

其家夤緣得首選聞之大怒立斥之門牆外其介若此居家嚴肅若公庭恥與世浮沈閒談人陰私者輒正色拒之入則讀古書出則正衣冠敦守禮法扶樹道教學者稱爲學山先生云

郝廷棟字柱臣武鄉人山乾隆壬子舉人司訓何曲憂歸起補榆次教諭以疾乞休家居十餘年卒生平讀書不喜涉獵務爲深湛之思尤精於易徧究諸家而折衷於朱子制舉文爲一時矜式兩任校官從學者甚衆有經師人師之稱性嚴正士憚之而其誨人也善啟發凡經指受皆有法度可觀在榆次時其令爲武鄉舊尹雅與善有以訟事持千金求爲關說者斥去之清潔之操至老不渝

李升齡字成九沁源人性廉介薦於內行治經有法以貢司

訓靈邱安貧樂道不改儒素武進湯貞愍貽汾時官都司朝
夕過從以名節相砥礪告歸年八十終於家同時吳生異字
元龍亦歲貢官壽陽訓導課諸生委曲盡誠澹泊不修邊幅
道氣盎然祁文端公嘗執贄門下盛稱之

魏松年字子如武鄉人孝友醇篤績學能文性嚴重衣冠言
笑一無所苟五十喪偶終身不再娶家故貧以筆舌供餽粥
非其所當有一毫莫取也由歲貢選猗氏訓導勤於其職謝
絕餽遺丁內艱歸服除選翼城訓導不就日取易象性理諸
書繙文釋義手自疏鈔以課子孫時作小詩自娛年踰八十
卒

王藍字霽初沁州人生有至性事親孝與弟友愛讀書刻苦
自礪志節皎然不隨流俗俯仰設館介休三十餘年修脯所

山西通志卷一百三十一 人物志
入率以趨人緩急士人皆重其義饒賈某慕其名以重幣延
入河東主商網書記居數月商以訟事求爲捉刀慨然曰吾
忍舍詩書逐腥膻爲人作訟師耶拂衣徑歸生平於學無所
不通醫卜堪輿之術皆有奇驗而不輕爲人役家居餽粥不
給詠嘯自如累舉不得志以歲貢終子省山見文苑學山拔
貢皆傳其學

以上
北州

趙奎字聚五樂平人乾隆戊辰舉於鄉品端學醇治經有法
司訓沁水卒於官弟子咸服心喪插柳致祭不絕於路
武承謨字劭孟孟縣人嘉慶庚辰進士授大庾知縣艱歸起
復歷知新安無錫卒於官性嚴毅讀書務心得求實用敦守
禮法恥梯脂韋以徇人釋褐後講誦不輟問業者屢滿戶外
三宰劇縣能以儒術節吏治所至民胥宜之

秦東來字旭堂孟縣人少穎異書過目成誦篤於內行事親
得歡心喪葬竭誠盡禮推產讓兄終身無少忤與人交一以
誠懇相待無疾言遽色以優行貢太學旋舉己亥鄉試一與
計偕因母老遂不復出博覽強識淹貫古今而務爲實踐力
行嘗題座右云跬步之間皆學問道德以外無功名人生至
樂孝與弟天下大防理及情教授生徒興起者甚衆晚歲主
講受川書院辦團防佐賑濟行以實力縣人倚賴焉所著有
論語贅辭易學致用復初堂詩文集卒祀忠義祠

以上平定州

樊翰字林卿定襄人少爲諸生有聲雅尚氣節有巨公以重
幣延入幕辭不就聞蓋匡李二曲講學襄城負笈從之遂爲
入室弟子以聖學始終在於誠因以誠名軒學使稽文敏公
嘗云林卿因靜以見理因理而得敬因敬能至誠及卒學者

私謚孝弟先生著有誠軒語錄

祖夏鼎靜樂人舉康熙辛卯鄉試博覽羣書尤邃於易占有奇驗時以知來之學推之任臨汾教諭以老辭歸嘗再修縣志邑之文獻賴以有徵同時李恂以貢授長陽令直正有聲爲梓其書

賀錫冕字士章定襄人乾隆壬午舉於鄉與縣人樊源達講學以李二曲爲宗王含溪制軍時宰五臺開崇實書院延之主講徐廣軒司馬時爲肄業生實師事之源達字澤長諸生志尙冲潔學主於爲己設教河汾一夕盜入館知爲源達所居卽去

以上
忻州

張其綱字子立五臺人前明歲貢性嚴正好義動必以禮就家築館凡四方讀書之無力者得入舍卒業行旅困乏投其

門無不優養或贖以資鼎革時盜四起剽掠至其里家人告之曰吾主人田舍家所有惟菽粟然已散之鄉里矣盜相顧引去嘗曰安貧樂道一生受用不盡吾所爲非自高也及卒鄉人皆爲流涕題其墓曰古君子

張燠字孔昭其綱子學者稱龍池先生幼清異昏夜無鎗能讀書或熟寐他人出入語言動作醒皆厯厯述之博涉載籍深悟聖學大旨沈靜淡泊人莫測其器量弱冠娶於崞縣李氏中丞補之孫女也親迎至里門里人闔門索綵紅錢燠驟馬而返主人聞之大駭追二里許乃挽轡止之曰此鄉中舊俗奈何遽爾燠曰他家無資爾公家詩禮望族奈何以婚禮爲兒戲主人謝過乃回順治戊子舉鄉試第二值姜瓖叛夙耳其名遣人脅之入幕燠僞臥病賊昇以行中道逸歸賊怒

火其居妻李氏及家人死者七人燠潛匿地窖中以免亂定
後閉戶讀書所學益達太原傅山與爲講學之友晚歲結茅
以居潛心研究每徘徊花樹間拱立凝思欣然時有所得
崞縣李太史燕生從之受學隔一兩月輒策蹇來一日講孟
子無爲其所不爲章語一時許猶未畢燕生起立曰語多恐
不能融貫請俟他日燠悵然曰天下容有能講書者何必龍
池燕生訝之歸未旬日而燠果卒矣燠性孝友居喪毀甚兄
失明推讓田宅所著有五芝堂四書正義易註等書嘗就正
於傅山山爲校訂親署檢端今散佚兄煒字孔榮亦潛研性
理學者稱龍潭先生以歲貢官大同訓導

張維字理夫崞縣人由副貢官保德州學正以實學訓士職
滿當遷以老辭值歲大祲散粟煮粥惠孚一時嘗著存心事

天圖說其孫贊注以行世贊亦副貢官至安慶府通判有勸諭恆言於儒者修己治人之道言之至詳

曲子宜五臺人博學多文潛心性理與興縣孫文定公嘉淦定襄齊解元建中薄進士龍皆推一時名宿而子宜困於鄉舉文定公督學江南延之入幕校拔精審南士皆折服文定爲延譽公卿問爭欲羅致門下子宜恥於干謁卒以育矜老栗秀菴字茂玉崞縣人康熙丁卯鄉舉研究洛閩之學實有心得當時推爲真孝廉任長治教諭勤於其職每月朔望會集諸生升堂宣講威儀秩然聞者莫不肅敬興起者衆蓋本其身教爲言教也學使者特疏薦焉未幾卒於官士人立碑頌之

陳錦華代州人雍正中歲貢性至孝讀書有志於聖賢之學

著文廟全書又蒐輯儒先嘉言懿行爲勸懲格言尤有功於學術人心

楊鎮字次岳代州人性沈靜多精識善誘後學一時名儒科第多出其門出授貢司訓芮城士風爲之不振未幾卒於官馮祁宇昭餘代州人性亮直坦易中無畛域家世貴顯而欣然謝紛華一肆力於學登乾隆丁巳進士選入翰林聞父疾卽日馳歸旣授編修甫就職以病去遂不復出家居擁書萬卷徜徉以終有子四廷丞見鄉賢延至宇尙寶其季也工詩知名

王作哲字舜臣五臺人戊辰進士授內邱令立身行政一本儒術有慈祥愷悌之譽願厭吏事乞改校官選平陽教授未幾卒內邱人思其德祀之名宦

毛思憲字邦公五臺人年十二通七經未冠補弟子員王制軍秉韜時宰縣闢崇實書院講古本大學思憲以名諸生與焉與徐進士潤第並研求性理躬行實踐同學推爲祭酒爲文渾灝有蘇氏法終身困名場晏如也晚年猶懸李二曲坐功圖於壁環堵中蕭然自得年七十九卒潤第爲作墓年進學記推稱甚至

徐天敘字典五五臺諸生早謝棘闈深斗室讀書其中終日危坐無暇倚泊家以禮內行修飭閭閻無譁笑聲仁厚好施予鄉人有爭競就天敘取平一言剖決咸悅服罷去人比之王彥方云

謝璠字石璠五臺人性嚴介勸學嗜古勤苦至忘飲食舉道光乙未鄉試自以年踰強仕不復營情利祿主講崇實書院

教以身先經其造就皆敦篤有法度士林至今頌之

郝應宿字柳園代州人道光丁未進士授吏部主事性和而介奉職清慎吏不敢干以私甫滿考以親老辭歸平生於學無所不窺尤究心宋儒書踐履篤實不苟言笑嘗教授徐溝造就甚衆及歸里爭厚幣延之以道遠艱於侍養謝不往主講繁峙從之遊者戶外屢恆滿口講指畫終日無倦容暇則正襟危坐或手一編吟詠自如視人世榮利泊如也嘗言學者先須檢束身心讀書行文方有著手處故從之間業者多恂謹有法度云

崔鼇峰字瀛甫代州人性耿介絕俗篤志於學以歲貢教授於鄉安貧樂道後進皆宗師之遊其門者並循謹有法同治初學使黃按試至州聞其名欲見之固辭會

詔舉孝廉方正特疏與汾陽曹樹穀定襄達順同薦皆

儒也士論榮之

以上代州

黃廷幹字貞菴河曲諸生弱冠卽有志聖賢之學躬行實踐一以程朱爲宗純孝性成因侍父疾究心醫理父卒奉母家居二十餘年母臥病歲餘衣不解帶創興義塾捐置膳餼以教邑中貧寒子弟質直好義老而彌篤

保德州

呂崇烈安邑人前明癸未進士

國朝累官禮部左侍郎性忱靜有知人鑑數典鄉會試甄拔胥吏慈喜讀書老而不倦宏運書院鄉先生曹真予講學地也曹沒崇烈主其事樞衣升堂威儀秩然晉人士多從之遊或橫經論難或卽事窮理聞者莫不灑然開悟著有語錄行於世

馬光裕安邑人順治丁亥進士官至禮部郎中持躬接物和雅溫恭潛心濂洛諸書與容城孫徵君蔚州魏尙書往復質辨一以躬行實踐爲主所著有止齋集子祚錫載錫禹錫俱傳其學

杜櫝字喬年平陸人事親以孝聞安貧樂道時與二子躬耕隴畔講論經義從之間業者甚衆表裏輝映志行純篤學者稱爲孝恭先生以子濱官贈宗人府主事

郭用光安邑人以貢官廣昌教諭性方嚴不妄交博覽羣書晚年尤嗜易所著有八卦圖說玩易釋義子于疆孫賜珏並以易魁於鄉從弟用賢亦歲貢好講學司訓太谷端毅有聲侯如勵字憲伯解州諸生學問淹通杜門不與世務取先儒格言昕夕觀省一言動必秉成法士林推之

李瑗解州人父倬有隱德訓子弟以誠敬瑗性孝友克承家學以歲貢選岳陽司訓教士先德行而後文藝嘗書座右云居一官劾一官之職位一日盡一日之事時以人師稱之薛于瑛字仁齋芮城人歲貢敦篤內行艱苦力學授徒鄉里以朱子小學爲宗一時多信從謝麟伯學使聞其名造廬禮焉奏給國子監學正銜與撫部鮑延至會城設勉學堂爲講學地未幾辭歸丁丑大禋朝邑相禮請襄辦賑務勞勩甚至尋以疾卒其門人爲祠祀之朝邑更資以百金令置祭田生平饜飫性理之書有大學中庸及小學注

馬佩珩解州人乾隆庚寅鄉試第一官太平教諭少貧甚刻苦勵學餽粥時不給誦讀自若嘗云吾開卷卽忘憂也每省試自負行囊就道夜宿村祠簷下爲常領解時方與妻共作

苦聞報若不知者然人服其雅量皆有聊存編聊存文稿行世董之璠亦由舉人官介休教諭勤於其職董元英副榜貢司訓興縣克盡倫常言動不苟世並以純儒稱之

孫大發字祥山解州人乾隆己酉以年例登副榜事繼母至孝處諸弟皆推讓而督課甚嚴勵學敦行聞望重一時從學者衆咸以理學目之而諸生張嘉琇亦善事繼母持身務自刻砥而於人無町蹊學以洛閩爲宗著有小學翼感發集

李雲棟解州人舉嘉慶庚午鄉試官連山廳同知有廉能稱爲人內行純篤好學不倦著有作人篇蒲季鄂庚午副貢朴誠溫厚持已教人以根柢之學爲先著周禮傳要新裁易經左傳讀本授徒鄉里以終

耿輝漢字蘊山夏縣人少孤事母至孝好學博覽強識經史

傳注洞徹源流道光乙未舉於鄉授隰州學正性廉介非義
贈饋一介弗受以實學啟迪諸生多有興者弟倬漢博雅嗜
古持身敬謹亦由舉人官右玉教諭

靳文蔚字豹卿安邑人道光庚戌進士授戶部主事母老乞
養歸遂不復出性恂謹敦守禮法積學工文主講書院造就
甚衆著有貽燕堂集

毛德如字雙九夏縣人應豐子舉咸豐戊午順天鄉試授兵
部主事敦品勵行湛深經術縣人延主書院講畫不倦從之
遊者皆有法度可觀

楊寶栗字寶成夏縣人敦篤孝友善處鄉里家不豐而存心
利濟見義勇爲研究經史尤造性理之學著四書辨誤初編
續編行世

郭迎暄安邑人咸豐初舉孝廉方正旋領鄉薦主蒲解講席垂二十年學養純粹士林翕然以儒者推之選崞縣訓導以疾乞休弟迎場壬戌舉人官渾源州學正有文名

以上解州

李承賜字己夫絳州諸生少事安邑曹真子秦中馮少墟兩先生安貧積學老而彌篤年七十聞辛復元名見以師禮辛年甫三十也人以爲難

支聯第聞喜諸生少孤嗜學閭賊之變昇母避深山雖亂離中融融色養不改常度與人交誠意相孚喜談忠孝事修眉瘦頰衣冠肅然望而知爲有道君子子發歲貢亦有學行王復初字心一絳州人父曰善有學行復初少聞爲學大指已復私淑其鄉辛復元不爲剽掠之學由副貢授古田知縣以嚴行恕吏民胥奉法唯謹遷揚州府同知尤多惠政致仕

歸闕嚴正齋日與党冰壑王君棟闡明性學不一與外事士林欽之

李敏秀字子潛絳州人以縣丞注選從党冰壑遊幾二十年守師說不敢變嘗曰西銘太極相爲表裏西銘言其當然太極言其所以然西銘猶大學太極猶中庸也晚而講易榜所居曰敦復年八十三卒

王桓字君棟絳州諸生簪書樂道有純儒稱同時張煜字晝初亦以文行著膺選拔貢太學遵父命終身不仕

張垣字紫居康熙丁卯舉於鄉居家孝友學問優長而雅甘淡泊與物無爭銓應州學正不赴授徒鄉里以終田文端公高其品爲詩贈之著有四書詳說及小亭詩草

曹仁字惕齋絳州人舉康熙乙酉鄉試其學本謝上蔡克己

山西通志卷一百五十三 儒林
須從性徧難克處克將去以之淑已卽以之教人王寅歲歉
家實不給而多方賑濟不屑自謀嘗語人曰吾絳自党冰壑
後惟李子潛倡明絕學子潛亦雅重之所著有三要續錄易
學心功偶得記

張其哲字明甫稷山人康熙庚子舉於鄉以母老不復求仕
授徒鄉里讀書研窮理道悟徹高深子圖杉乾隆丙子舉人
亦博通淹貫克稱象賢

王瞰字始旦絳州人以騎射補武學生好讀儒先語錄著述
頗富學使以正儒獎之

梁萬方字統一幼嗜學既爲諸生謝去舉業師事党冰壑潛
究濂洛關閩宗旨嘗手錄道統淵源闡明正學又增訂朱子
儀禮經傳通解乾隆間三禮館纂修義疏徵取之以備參考

性至孝奉母跬步不離母疾衣不解帶者六年鄉居出粟賑饑設義塾起汾河輿梁利濟之懷常若不及云張景哲亦諸生講學相得性强記萬方有疑難輒函詢之所訂儀禮景哲實助成焉

李世仁字育菴絳州人神胥子也以父蔭肄業成均擢刑部主事轉員外郎中凡鞠讞條奏俱手裁不假胥吏以疾歸起補廣西左江道所轄府州當閩廣衝俗犷悍稱難治世仁振綱肅紀邊民帖然嗣以母疾乞假歸尋卒

柴平富字丕公絳州人歲貢性端方幼時言笑不苟比長聞李子潛名往師之篤嗜朱子小學諸書居喪盡禮不入私室者六年著四書偶鈔壁經拾遺周易雜記藏於家王兆鵬亦歲貢耿介絕俗著有四書宗朱正旨隱居教授以耆壽終

馮繼祖字昭武絳州人以歲貢生司訓榆次刊孝經說約諸錄編給諸生誦讀以道義相期勉凡束脩來者收而籍之用以修葺廟學施給單寒改平定訓導課亦如之

閻廷玠字子縝絳州人家貧力學能文章嫻吟詠既師事李子潛遂究心洛閩諸書舉雍正壬子鄉試選甯武教諭告歸主講東雍書院以終其學一以主敬爲宗力敦實行嘗刻布薛文清公讀書錄李開章儒教辨正錄著有述峰詩文集

閻懷珍字月生稷山人幼嗜學讀朱子小學期見諸行事進退坐立皆有法度事兄甚謹中年喪妻竟不復娶同學某官京師館其家歲脩甚腆某沒貧不能歸喪賣田贖之有麥舟之義焉年八十三卒

王樸絳州人少力學爲諸生尋謝去研精性理諸書與曲沃

賈荆山大甯曹陶菴共相商確其學主於誠實敦篤晚自號曰迂叟著有純孝篇閩幽集思齊錄燕居錄諸書

謝丕振字光宗絳州人少聰慧博學好古尤嗜洛閩微言偶有心得輒手錄之盡所爲夜必札記用自省以恩貢授平遙教諭輯蘇湖教法以範多士訂稽德考學二簿月朔輒覆核而勸戒之言溫氣和因人才之所進而導於善士習爲之不振箸有河汾淵源諸書

張書聖字睿公絳州人生有至性事親以純孝稱與州人閻子縝稷山閻君含相師友講明正學務躬行實踐不爲空談平居粗衣糲食而輸粟救荒者三其他與社學脩道路繕橋梁凡有關風教有益民生者無不竭力爲之

甯鳳翔字叔遜聞喜人天性孝友學識淵涵甚爲提學袁臨

侯所稱晚年究心易學著述甚富以歲貢終

師謙字洙賢聞喜人讀書以存心養性爲本不求聞達潛心著述家無宿眷泊如也其後有諸生翟恂儀方伯鳳翥子也王釋字念原以貢官五舉訓導並以研窮理學爲士林所宗趙一聚字敬甫聞喜諸生爲學以洛閩爲宗師事曲沃衛蒿蒿卒爲經紀其喪浮屠聞喜其後啟柩歸一聚仍請衣冠葬之歲時醑祭不衰而刻其所著四書答問傳世其篤信若此高瑄字楚石稷山諸生事親色養無閒父喪廬墓幼讀薛文清戒子書卽思自立及讀其曾祖應聘所纂河汾粹言曰此聖賢正傳也自是學益切實尤精於易著有周易朱註刪補汾崖集諸書

解承先稷山諸生性端謹不妄言笑內行敦摯守禮法不少

縱軼博涉典籍尤於小學近思錄尋繹不釋所著有續先師廟祀儀求心錄語錄欲燬集等書

閩有光稷山人幼嗜性理諸書聞絳人李子潛得黨承堅之傳遂受業焉學期實踐動止以古爲則宜興儲六雅高其品盛稱之以歲貢終

郝彭齡字超凡河津人以學行爲前後邑令所重遇事有關民瘼者侃侃直陳而非公未嘗一謁也好讀史嘗摘精語爲立人要言切於身世年八十自知死期語家人無疾而終

張恪字燕菴少孤事祖母孝讀書務博覽而於先達薛氏讀書錄尤潛心玩索言動奉以爲則日有所爲必書之自省年踰七十卒子汾宿歲貢

石雲根垣曲諸生嗜讀書手不釋卷洪洞范郝鼎著理學備

考雲根與編校多所訂正居鄉恂恂稱儒者然事關風化輒直言無隱以是縣大夫屢造訪焉

張篤行垣曲人積學工文時聚邑中後進講論經義多所造就崇尚實學生平以修省爲要所著有高臥警言及詩集張澍字汝霖稷山人性方嚴少從孫文定公遊爲學務求實用以選貢任祁縣教諭俗素浮靡人競於利居喪好作佛事或釋服作樂相賀皆嚴戒之諸生有爭訟輒情解理論其有爲長吏冤抑者則力護之無所嫌阿用是咸感服從教惟謹學使高其誼爲書河汾正氣贈之告歸年踰九十卒著有四書補要慶雲亭詩草昭餘錄讀史類抄辨訛暗室燈等書張育枏字香圃幼穎悟讀書涉目成誦以諸生循序貢太學絕意仕進講學家塾遠近從者甚衆平生務尚名節篤於人

倫一時士大夫皆高其行及卒私謚爲文貞先生

撤夢元字春堂絳縣人由舉人任餘干知縣淡於仕進未滿
考卽告歸授徒鄉里文行爲一時所宗塾師王某少時嘗從
之學王卒妻無依養之終身工詩及制舉文著有聲調譜行
世

文祖堯垣曲人乾隆丁巳進士性孝友植品端方人不敢干
以私任潞安府教授造士有法郡舊有起文書院太守延之
主講從遊甚衆比諸蘇湖學舍焉

馬麟鳳字海洲絳縣歲貢事親以孝聞居鄉儀表端肅以修
行勵品汲引後進親族有急必竭力扶助未嘗以貧辭也著
有先儒祀典弟子規行世張展翎諸生講學里中稱耆儒

潘世澤字鏡湖聞喜人嘉慶己卯舉於鄉少好讀書苦不能

成誦聞前輩閭百詩餉書案上苦讀事慕而效之及長竟博
通經史歷平定州學正澤州府教授所至有聲性嚴正諸生
侍坐威儀秩然講學外語不及鄙事遇士之才而貧者輒割
俸助之讀其教人務以窮經爲根柢年踰七十猶口吟手披
不輟有古人炳燭之風

閻敏行字遜堂絳州人性沈厚嗜學博覽古籍尤深於易及
宋五子之書教人先讀小學又別編小學十則便村蒙誦習
以歲貢署吉州學正卒絳自明季辛全講學著書繼之以黨
成李生光諸人風氣最盛當時稱爲理學淵藪乾隆以來傳
者頗乏能自奮興力紹其鄉先生者有吳峨峯字壯川歲貢
來希孔字子庸諸生與敏行並爲世稱其後有歲貢馬騰蛟
諸生郝步雲舉人趙國璧皆敦品勵學不失宗旨

葉長春字仙圃絳州人道光辛巳舉於鄉淡泊營一肆力於學有以疑難質者輒窮源竟委工書得者皆珍之

暢體元字汝正河津人幼以孝稱由拔貢任洛南知縣清慎愛民告歸行李蕭然著有洙泗從信錄

鄧洛稷山人舉道光甲午鄉試嘗授徒他鄉夜獨坐主婦私奔正色拒之次日託故辭歸持躬敬莊雖燕居端坐正衣冠有古儒者風

郝鳴高字厚菴絳州人廩貢積學窮理年踰八十嘗曰仁者靜者默者拙者皆壽人以爲自道其所得云著有復初錄壹知齋記

張掄秀垣曲人家貧好學雖耕稼嘗佩尚書一卷間有心得卽鈔之晚年督大學中庸錄義以歲貢終絳州

曹續祖字子成大甯人順治甲午舉於鄉性至孝以養母終身不仕母沒居喪悉遵家禮儀節年八十猶莊誦宋六子書不少輟著述甚富唐鑑輯

國朝學案咏其原心篤穢書偽學詩稱爲實踐而恪遵語孟無一言涉於虛云州

張元甲靈石人性至孝親沒喪葬悉遵古禮博學好古不事舉業凡小學近思錄經書史鑑性理諸編無不窮究根柢身體力行室如懸罄泊如也州

右一百七十二人

又三十四人附見